



04/03/2026



MES 5 26 0000261689

გადაწყვეტილება

შპს საქართველოს საერთაშორისო უნივერსიტეტ ჯიუს „სინოლოგიის“ ინგლისურენოვანი საბაკალავრო საგანმანათლებლო პროგრამის აკრედიტაციის შესახებ

1. გადაწყვეტილების მიღების სამართლებრივი საფუძვლები

1.1. „უმაღლესი განათლების შესახებ“ საქართველოს კანონის 66-ე მუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული „უმაღლესი საგანმანათლებლო დაწესებულებების საგანმანათლებლო პროგრამების აკრედიტაციის დებულების“ 27² -ე მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵ - ე მუხლის მე-5 პუნქტის თანახმად, საბჭო ვალდებულია დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ე მუხლის მე-2 პუნქტის „ა“ ქვეპუნქტისა და აკრედიტაციის დებულების 27⁵ - ე მუხლის პირველი პუნქტის „ა“ ქვეპუნქტის შესაბამისად, საბჭო იღებს გადაწყვეტილებას საგანმანათლებლო პროგრამისთვის აკრედიტაციის მინიჭების შესახებ, თუ „უმაღლესი განათლების შესახებ“ საქართველოს კანონის 66-ე მუხლის მე-4 პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის მე-8 პუნქტისა და აკრედიტაციის დებულების 27⁶ - ე მუხლის პირველი პუნქტის „ა“ ქვეპუნქტის შესაბამისად, საგანმანათლებლო პროგრამის პირველი და ყოველი მომდევნო აკრედიტაციის შემთხვევაში, საგანმანათლებლო პროგრამა აკრედიტაციის სტანდარტებთან შესაბამისობის შეფასებისას, ყველა სტანდარტთან მიმართებით საბჭოს მიერ შეფასდა, როგორც „სრულად ან/და მეტწილად შესაბამისობაშია სტანდარტის მოთხოვნებთან“.

1.3. „აკრედიტაციის დებულების“ 27⁵-ე მუხლის მე-3 პუნქტის შესაბამისად, აკრედიტაციის მინიჭების შესახებ გადაწყვეტილების მიღების შემთხვევაში, საბჭო უფლებამოსილია აკრედიტაციის მამიებელს მისცეს რეკომენდაციები.

1.4. „აკრედიტაციის დებულების“ 27⁶-ე მუხლის პირველი პუნქტის „ბ“ ქვეპუნქტის თანახმად, ერთ სტანდარტთან მიმართებით მაინც შეფასდა, როგორც „მეტწილად შესაბამისობაშია სტანდარტის მოთხოვნებთან“ და არცერთ სტანდარტთან მიმართებით არ შეფასდება, როგორც „ნაწილობრივ შესაბამისობაშია სტანდარტის მოთხოვნებთან ან „არ არის შესაბამისობაში

სტანდარტის მოთხოვნებთან", საბჭო იღებს გადაწყვეტილებას აკრედიტაციის შესახებ და დაწესებულებას განუსაზღვრავს ვადას მიღებული რეკომენდაციების შესრულების თაობაზე ანგარიშის წარსადგენად, რაც ასახება საბჭოს სხდომის ოქმში.

2. აღწერილობითი ნაწილი და დასაბუთება

2.1. სსიპ - განათლების ხარისხის განვითარების ეროვნული ცენტრის დირექტორის 2025 წლის 01 დეკემბრის №1702309 ბრძანების საფუძველზე, განხორციელდა შპს საქართველოს საერთაშორისო უნივერსიტეტ ჯიუს „სინოლოგიის" ინგლისურენოვანი საბაკალავრო საგანმანათლებლო პროგრამის შეფასება.

2.2 საბჭომ შეისწავლა საგანმანათლებლო პროგრამის აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშსა და მასზე თანდართულ დოკუმენტაციაში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიცია.

2.3 სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიციის, ასევე, სხდომაზე დაინტერესებული მხარის ზეპირი პოზიციის მოსმენის საფუძველზე, საბჭომ მეტწილად გაიზიარა ექსპერტთა დასკვნაში დაფიქსირებული შეფასება, კერძოდ:

ა) საბჭომ სტანდარტის 2.1 კომპონენტის რეკომენდაცია დააკორექტირა და გადაიტანა 3.1 კომპონენტში:

„რეკომენდებულია, უნივერსიტეტმა მხარდაჭერი სერვისის სახით სტუდენტებს შესთავაზოს ინგლისური ენის, არანაკლებ B2 დონის კურსი". აღნიშნული კომპონენტი ნაცვლად „მეტწილად შესაბამისობაშია სტანდარტის მოთხოვნებთან" შეფასდა, როგორც „შესაბამისობაშია სტანდარტის მოთხოვნებთან".

ხოლო სტანდარტის 3.1 კომპონენტი ნაცვლად „შესაბამისობაშია სტანდარტის მოთხოვნებთან" შეფასდა, როგორც „მეტწილად შესაბამისობაშია სტანდარტის მოთხოვნებთან".

3. სარეზოლუციო ნაწილი

„უმაღლესი განათლების შესახებ" საქართველოს კანონის 66-ე მუხლის პირველი პუნქტის, მე-2 პუნქტის "ა" ქვეპუნქტის, მე-3 და მე-4 პუნქტების, „განათლების ხარისხის განვითარების შესახებ" საქართველოს კანონის 22-ე მუხლის პირველი პუნქტის, მე-2 პუნქტის „ა" ქვეპუნქტის, მე-3 და მე-8 პუნქტების, აკრედიტაციის დებულების 27² -ე მუხლის პირველი პუნქტის, 27⁵ -ე მუხლის პირველი პუნქტის „ა" ქვეპუნქტისა და მე-5 პუნქტის, 27⁶ -ე მუხლის პირველი პუნქტის „ბ" ქვეპუნქტის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ" სსიპ - განათლების ხარისხის განვითარების ეროვნული ცენტრის დირექტორის 2011 წლის 01 ივნისის №223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად,

გადაწყვიტა:

1. დაკმაყოფილდეს შპს საქართველოს საერთაშორისო უნივერსიტეტ ჯიუს მიერ წარმოდგენილი სააკრედიტაციო განაცხადი და დანართი №1-ით გათვალისწინებულ „სინოლოგიის" ინგლისურენოვან საბაკალავრო საგანმანათლებლო პროგრამას მიენიჭოს აკრედიტაცია კლასტერის ვადით, 2030 წლის 01 მაისამდე.

2. ცნობილ იქნას აკრედიტაციის ექსპერტთა ჯგუფის დასკვნა „სინოლოგიის" ინგლისურენოვანი საბაკალავრო საგანმანათლებლო პროგრამის შესახებ ამ გადაწყვეტილების განუყოფელ ნაწილად (დანართი №1).

3. ცნობილ იქნას საბჭოს 2026 წლის 04 მარტის სხდომის №261650 ოქმის № 01 ნაწილი ამ გადაწყვეტილების განუყოფელ ნაწილად (დანართი №1).

4. დაწესებულებას საბჭომ შესასრულებლად განუსაზღვრა შემდეგი რეკომენდაციები:

რეკომენდაციები:

1. რეკომენდებულია, ჩინური ლიტერატურის, ფილოსოფიური სკოლების, სახელოვნებო ტრადიციებისა და რელიგიური მიმდინარეობების ფართო ცოდნის მიზნის დაზუსტება და კორექტირება, და უზრუნველყოფა, რომ იგი თვალსაჩინოდ იყოს დაკავშირებული სასწავლო გეგმის კურსებთან.

2. რეკომენდებულია გადაიხედოს პროგრამის მიზანი „სტუდენტების კომპეტენციების განვითარება ჩინურ ენაზე ეფექტური წერის, კითხვის, მოსმენის, საუბრისა და თარგმნის სფეროში, როგორც ძირითადი, ასევე რთული გრამატიკული და ენობრივი სტრუქტურების გამოყენებით“. მიზანი უნდა იყოს მკაფიოდ ჩამოყალიბებული, არ იყოს შინაგანად წინააღმდეგობრივი და აშკარად იყოს დაკავშირებული სასწავლო გეგმის კურსებთან.

3. რეკომენდებულია სწავლის შედეგების გადახედვა, რათა უზრუნველყოფილი იყოს თანმიმდევრულობა და შესაბამისობა სტუდენტების რეალურ ენობრივ ცოდნასთან და სასწავლო გეგმის დაფარვასთან. „ჩინურის საბაზისო დონეზე ეფექტურად გამოყენების“ გაცხადებული უნარი უნდა განახლდეს, რათა ასახავდეს ენის „საშუალო დონეზე“ ცოდნას.

4. რეკომენდებულია უსდ-მ სწავლის შედეგებში მიუთითოს თარგმანის ენა.

5. რეკომენდებულია, რომ უსდ-მ სწავლის შედეგებში ჩართოს წერა, როგორც აუცილებელი ენობრივი უნარი.

6. რეკომენდებულია სტაჟირების დაგეგმვა ბაკალავრის ნაშრომის დაწერამდე ერთი სემესტრით ადრე და მისი წინაპირობების შესაბამისად გადახედვა.

7. რეკომენდებულია შეიცვალოს აკადემიური პროგრამის მეორე მიზანი შემდეგნაირად: „ჩინური ლიტერატურის, ფილოსოფიური სკოლების, სახელოვნებო ტრადიციებისა და რელიგიური მიმდინარეობების საბაზისო ცოდნის ხელშეწყობა“, თუკი სინოლოგიის პროგრამა იმგვარად არ გადაიხედება, რომ სტუდენტებმა რეალურად შეძლონ ამ სფეროებში ფართო ცოდნის შექმნა.

8. რეკომენდებულის დიპლომატიურ ჩინურ ენასთან დაკავშირებული დამატებითი თემები და ლექსიკა იყოს ინტეგრირებული ან სავალდებულო ჩინური ენის კურსებში, ან თარგმანის ტექნიკისა და სტრატეგიების კურსში.

9. რეკომენდებულია ჩინური ენის სწავლების მეთოდოლოგიის კურსის სასწავლო გეგმა შესწორდეს ისე, რომ სასწავლო გეგმის შესაბამისად, წინაპირობად მიეთითოს ჩინური ენა 5.

10. რეკომენდებულია ჩინური ენა - მედიის კურსის სწავლის შედეგები შეიცვალოს. ფრაზა „თავისუფლად ფლობს“ უნდა შეიცვალოს „ჩინური ენის საშუალო დონეზე ფლობა“-თი. (დამატებითი დეტალებისთვის იხილეთ ზემოთ მოცემული „შეჯამებისა და ანალიზის“ განყოფილება.)

11. რეკომენდებულია HSK 2-ის სასწავლო გეგმაში წინაპირობად მიეთითოს ჩინური ენა 1, რათა შეესაბამებოდეს სასწავლო გეგმას, ხოლო კურსის სტატუსი უნდა შეიცვალოს „არჩევით“-ით.

12. რეკომენდებულია არჩევითი კურსების HSK 2 და HSK 3 სასწავლო გეგმა გადაიხედოს, რათა სრულად აისახოს შესაბამისი HSK დონეების შინაარსი და არ შემოიფარგლოს მხოლოდ შერჩეული ერთეულების სწავლებით. იმის გათვალისწინებით, რომ HSK 4-ის შინაარსის სათანადოდ სწავლება მისი მასშტაბის გამო შეუძლებელია ერთ სემესტრში, HSK 4 არჩევითი კურსი უნდა დაიყოს ორ კურსად: HSK 4 (1) და HSK.

13. რეკომენდებულია სავალდებულო სასწავლო მასალა ჩინეთის ზოგადი მდგომარეობა - გო პენგი და ჩენ ლონგი, ჩინეთის პანორამა (2012) - განახლდეს ან დაემატოს უფრო ახალი მასალები, რათა ადეკვატურად ასახავდეს ჩინეთის საზოგადოებაში მიმდინარე მოვლენებსა და ტენდენციებს.

14. რეკომენდებულია განახლდეს YouTube ვიდეო ბმულები, რომლებიც ჩამოთვლილია ჩინური ენა - სასაუბროს სასწავლო გეგმის „დამატებითი რესურსებში“, რადგანაც ეს ბმულები, როგორც ჩანს, აღარ არის ხელმისაწვდომი.

15. რეკომენდებულია, უნივერსიტეტმა მხარდამჭერი სერვისის სახით სტუდენტებს შესთავაზოს ინგლისური ენის, არანაკლებ B2 დონის კურსი.

5. საბჭოს აღნიშნული გადაწყვეტილება ძალაში შევიდეს 2026 წლის 17 თებერვლიდან.

6. საბჭოს მიერ გაცემული რეკომენდაციების შესრულების შესახებ ანგარიშის წარმოდგენის ვადად განისაზღვროს ერთი წელი - 2027 წლის 17 თებერვალი.

7. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 241 მუხლის პირველი პუნქტის შესაბამისად, საგანმანათლებლო დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის მე-2 შესახვევი №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი №64, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) კანონმდებლობის შესაბამისად დაწესებულებისთვის გაცნობის დღიდან, ერთი თვის ვადაში.

საგანმანათლებლო პროგრამების აკრედიტაციის საბჭოს
სხდომის მდივანი
დურული ციური



საგანმანათლებლო პროგრამების აკრედიტაციის საბჭო
თავმჯდომარე
ლევან შავაძე



№	ინფორმაცია საგანმანათლებლო პროგრამის შესახებ	
1	საგანმანათლებლო პროგრამის დასახელება	სინოლოგია
2	ერთობლივი უმაღლესი საგანმანათლებლო პროგრამა	-
3	სტატუსი	ახალი
4	სტატუსის გათვალისწინებით, საბჭო(ებ)ს გადაწყვეტილების თარიღი და ნომერი	-
5	ხელახალი აკრედიტაციის შემთხვევაში საგანმანათლებლო პროგრამის წინა დასახელება	-
6	უმაღლესი განათლების საფეხური	ბაკალავრიატი
7	დაშვების წინაპირობები	-
8	კვალიფიკაციის დონე	6
9	კვალიფიკაციის დასახელება	სინოლოგიის ბაკალავრი
10	ზოგადი განათლების შესაბამისი საფეხურის საგნის/საგნების/საგნობრივი ჯგუფის სწავლების უფლების მითითებით	-
11	დეტალური სფეროს დასახელება და კოდი (ISCED – F – 2013)	-
12	სწავლების ენა	ინგლისური
13	ECTS კრედიტების ჯამური რაოდენობა	240
14	განხორციელების ადგილი	5 სამღერეთის ქუჩა, თბილისი, საქართველო, 0179
15	მსჯავრდებულ აბიტურიენტთა საგანმანათლებლო პროგრამაზე სწავლასწავლების უფლებამოსილება	-
16	ამ გადაწყვეტილების ძალაში შესვლის თარიღი	17/02/2026
17	აკრედიტაციის საბჭოს მიერ გაცემული რეკომენდაციების შესრულების თაობაზე ანგარიშის წარმოსადგენად/მონიტორინგის განსახორციელებლად განსაზღვრული ვადა	აკრედიტაციის საბჭოს მიერ გაცემული რეკომენდაციების შესრულების თაობაზე ანგარიშის წარმოსადგენად 1 წელი - 2027 წლის 17 თებერვალი
18	აკრედიტაციის ვადის გასვლის თარიღი	01/05/2030